



Martes, 3 d'ochobre del 2022

El Principáu impulsa la II edición del Reguerada Fest pa promocionar la cultura y l'entamamientu en llingua asturiana

- L'eventu, que va axuntar a una ventena d'entidaes ente'l 13 y el 15 d'ochobre, va celebrase en Candás
- El programa incluye alreduer de 30 actividaes de baldre y una feria con empreses del sector

La Viceconsejería de Cultura, Política Llingüística y Deporte impulsa la II edición del Reguerada Fest, un puntu d'alcuentru y promoción de la cultura y el mundu empresarial qu'usa la llingua asturiana como seña d'identidá. D'esta miente, una ventena d'entidaes y creadores van citase en Candás ente'l 13 y el 15 d'esti mes pa mostrar el so trabayu. Amás, va haber cerca de 30 actividaes de baldre.

El director xeneral d'Acción Cultural y Normalización Llingüística, Antón García, presentó güei la programación d'esta iniciativa. Les actividaes, dirixíes a tolos públicos, incluyen una feria, recitales literarios, talleres, charles, esposiciones y conciertos, que van desenvolvese na Fábrica d'Ortiz, el Teatru Prendes, el Muséu Antón y la Biblioteca de Candás.

El festival nació l'añu pasáu cola vocación d'averar a la sociedá les actividaes que desenvuelven creadores, entamadores y organizaciones sociales alrodiu de la llingua asturiana. El Reguerada Fest fai homenaxe col so nome a Antón de Marirreguera, nació nel conceyu de Carreño y autor de la que se considera la primer obra lliteraria n'asturianu que se caltién.

La inauguración de la esposición *Filu/pallabra*, una muestra artística de la uvieína Dido Carrero, va dar empiezu al Reguerada Fest el viernes 13 nel Muséu Antón. Pela so parte, la Fábrica d'Ortiz va acoyer a lo llargo del festival un mercáu y una feria de llibros y empreses con venti entidaes participantes.

La llista d'actividaes incluye recitales poéticos, alcuentros con autores y meses redondes, amás de proyecciones de películes asturianas, actuaciones de Teatru Carbayín y cuntacuentos con Carlos Alba. Amás,





va haber talleres d'escritura, d'estampación testil y de construcción de títeres pa tolos públicos. Tamién ta prevista una ruta cultural y lliteraria per Candás.

La parte musical del Reguerada Fest va tar al cargu de la Banda de Gaites de Candás, Algaire, Alicia Álvarez y el so *Kíkiriki* pal públicu infantil y Nacho Vegas, que va tocar los sos *Cantares dende'l pie*. Va haber, amás, un pasucáis al cargu del Grupu de Baille San Félix.

Toles actividades van ser de baldre. Los detalles de la programación tán disponibles na web www.asturiesculturaenrede.es